



Berhubung dengan keluaran ini sebagai keluaran menyambut hari kemerdekaan Indonesia maka di sini kita menyebarkan perjalanan ini lebih panjang sedikit daripada biasa oleh kerana di dalam riwayatnya mengenai istiadat penyerahan Belanda kepada kedaulatan Indonesia yang menjadikan sambutannya pada 17 Ogos 1950 ini ialah sambutan yang besar oleh kerana Indonesia telah menjadi sepenuh-penuh kerajaan yang berdaulat dengan sepenuh-penuh maknanya berdiri sama tinggi duduk sama rendah dengan kerajaan-kerajaan yang lain di dalam dunia ini. Riwayat ini sengaja ditulis panjang mudah-mudahan menjadi suatu peringatan kepada penduduk di gugusan pulau-pulau Melayu ini bahawasanya nun di seberang tidak jauh daripada Tanah Melayu ini terdiri sebuah kerajaan Indonesia yang seketurunan dengan penduduk Tanah Melayu ini yang haknya telah cuba dirampas daripada tangannya.

(Oleh Edrus – khas bagi majalah Qalam sahaja)

Kesukaran saya yang pertama tiba di Jakarta itu adalah terlepas sedikit dengan kerana saya dengan bersembunyi telah dapat membawa wang sebanyak dua ribu Rupiah (dua helai wang kertas seribu-seribu). Saya katakan ringan sedikit ialah oleh kerana saya boleh mengambil wang saya kepada taukeh Cina sebab mulai dari 26 Disember 1949 pejabat-pejabat dan kedai-kedai di sana semuanya telah tutup membawa kepada hari lepas penyambutan yang dirancangkan terus kepada 29 atau 30 hari bulan Disember itu. Dengan adanya wang itu mudahlah bagi saya berjalan. Hari itu saya tidak dapat hendak ke mana-mana selain daripada tujuan mencari jalan akan mendapat surat-surat kebenaran khas di dalam majlis penyerahan yang akan diadakan pada esoknya (27 Disember) mulai dari pukul 4.30 petang.

Di Singapura lagi saya telah mendapat beberapa alamat

jabatan-jabatan yang boleh memberi pertolongan di dalam perkara ini dan yang demikian saya pun pergi kepada tempat-tempat yang tersebut dengan naik sebuah teksi. Ikhtiar saya itu akhirnya tidak berjaya kerana semua pejabat-pejabat itu tutup. Saya telah bertanya kepada pengawal-pengawal di situ di mana rumah ketua-ketua itu masing-masing tetapi jawab pengawal-pengawal itu sangat menghampaskan saya kerana mereka sama seperti saya juga tidak tahu di mana tempat tinggal pengawai-pegawai itu.


Setelah putus harap itu maka saya pun teringat kepada suatu alamat yang diberi oleh keluarga saya di Singapura ini kepada seorang kenalannya yang tinggal di Kwitang Dalam dan setelah bersusah payah maka saya pun sampai ke rumahnya yang kebetulan ia pun baharu balik dari pejabatnya. Setelah sejurus duduk di situ maka saya mulai bertanya tentang di manakah panitia sambutan Kongres Muslimin di Jakarta.

Soal ini telah dijawab olehnya menyatakan bahawa panitia itu alamatnya ialah di Kang Syuan Nombor 25 dan yang mengurusnya ialah Tuan Sidik as-Syarikati anak kepada Almarhum Tuan Sheikh Ahmad as-Syarikati ketua al-Irsyad yang masyhur dan terkenal di seluruh Indonesia. Setelah mendapat keterangan ini saya pun pergi semula ke sana tetapi malang bagi saya ia tidak ada di rumah dan dengan itu saya pun meninggalkan alamat saya dengan kad pengenalan saya. Kemudian saya pun balik ke hotel saya dengan suatu perasaan yang hampa dan berduakacita oleh kerana saya sehingga masa itu belum mendapat surat-surat kebenaran bagi meluluskan saya hadir dalam istiadat yang utama dan luar biasa itu.

Lebih kurang 5 petang itu tatkala saya sedang duduk di hadapan hotel maka saya melihat seorang berbadan tegap dan gempal telah turun dari sebuah motokar "Singer" jenis lama yang saya fikir barangkali itulah sahaja sebuah jenisnya yang ada di Jakarta. Ia masuk

ke dalam hotel itu. Saya menyangka ialah seorang ahli perniagaan dan oleh sebab itu saya tidak mengambil endah tatkala ia masuk ke sana. Sejurus orang itu pun keluar dari dalam hotel itu lalu mendapatkan saya dengan bertanya nama saya dengan suatu perkataan yang baik dan berteribut saya menjawab mengenalkan diri saya dan kerana saya dengan sama keturunan orang Arab maka perkenalan kami berdua pun lebih mudah dengan cara-cara kebiasaan yang sama. Saya kemudian menceritakan kepadanya bahwasanya saya ialah seorang yang gharib di Jakarta ini dan saya minta pertolongan bagi mendapatkan kehendak-kehendak saya.

Dengan ringkas esoknya alangkah sukacita saya kerana ia membawa saya ke sana ke mari dengan sepenuh-penuh tenaganya sehingga akhirnya saya telah mendapat apa yang saya kehendaki itu. Lebih kurang pada pukul 12 tengah hari iaitu dengannya saya telah mendapat surat-surat kebenaran masuk ke dalam istiadat yang penuh riwayatnya pada petang itu (27 Disember 1949). Kemudian



Dengan rupa yang sedih Gabenor Jeneral Indonesia yang berdiri di tengah-tengah itu sedang memberi hormat kepada bendera Belanda yang diturunkan di Istana Gambir pada pukul 6 petang 27 Disember 1949 iaitu setelah bendera itu berkibar di Indonesia selama lebih 350 tahun lamanya – Gambar Qalam.

Setelah mendapat semuanya maka kami berdua pun pergihal mendapatkan Tuan Abdul Hamid al-Khatib utusan daripada Arab Saudiah yang tinggal di hotel di sini (Das Indies). Kedatangan Tuan Abdul Hamid al-Khatib ini ke Jakarta adalah sebagai wakil istimewa bagi kerajaan Arab Saudiah. Ia berpakaian dengan pakaian-pakaian Arab dan demikian juga pengiring-pengirinya serta dua orang jurubahasanya, seorang dalam bahasa Melayu dan seorang dalam bahasa Inggeris. Tatkala duduk bercakap-cakap itu saya melihat kepadanya dengan saksama dan saya memandang dengan hebat kepadanya oleh kerana rupanya ia berasal dari darah Indonesia itu sifat dan gayanya telah berubah seperti keadaan orang Arab jati. Ia memakai jambia yang bersarung dengan emas dan bertatah dengan permata. Demikian juga ia memakai suatu pedang yang bersarung dengan emas dan bertatah permata juga. Yang demikian ini menjadikan saya teringat apakah kata ulama-ulama tentang hukumnya orang yang menggunakan emas yang demikian itu. Ini lebih-lebih lagi kerana yang memakainya itu wakil daripada kerajaan yang menjaga dan mengawal keamanan di tanah suci.

Di dalam perjumpaan ini saya telah bertanya perihal cukai haji yang dikenakan oleh kerajaan Saudiah Arabiyah kepada orang-orang yang datang menuaikan fardu haji itu. Isi kandungan perjumpaan ini telahpun saya tulis di dalam akhbar Majlis dan tidaklah payah rasanya saya mengulangnya semula di sini.

-----*-----*

Sekarang marilah saya membawa pembaca-pembaca memerhati kepada istiadat penyerahan pada pukul 5 petang 27 Disember 1949 itu. Kejadian ini ialah suatu kejadian yang tidak akan dapat dilupakan oleh tiap-tiap umat Indonesia kerana dengannya penjajahan Belanda di Indonesia semenjak 350 tahun



Sebelah kiri ialah Tuan Sultan Syahrir dengan tersenyum sedang naik ke Istana Gambir tatkala menyambut ketibaan Presiden Sukarno ke Jakarta pada 28 Disember iaitu sehari sesudah penjajahan Belanda tamat di negara Indonesia. – Gambar Qalam

dahulu itu telah tamat iaitu setelah umat Indonesia mengadakan pertelagahan yang hebat bukannya sahaja di dalam pertelagahan yang akhir ini tetapi ialah pertelagahan semenjak zaman Pengeran Dipenogoro, Tokku Panglima Pulim, Tokku Umar Johan Pahlawan dan lain-lain lagi. Perjuangan ini sesungguhnya berlaku di beberapa daerah yang berlainan-berlainan tetapi yang demikian adalah dipandang sebagai suatu perjuangan melawan tindasan-tindasan Belanda yang hebat di Indonesia sehingga mencitrakan riwayat-riwayat hidup, mencitrakan tawarikh-tawarikh yang benar adalah menjadi suatu kesalahan yang boleh dijatuhkan hukuman bunuh sebab ditakuti olehnya apabila riwayat itu diketahui sudah tentu penjajahan itu akan dilawan lebih tepat dan bersama-sama oleh semua penduduk.

Nazam yang dikarang oleh Tokku Che Dek Tiro yang masyhur itu tidak dibenarkan sekali-kali dibaca atau disimpan oleh orang-orang Aceh. Ini adalah sebagai contoh bagaimana gagasan-gagasan yang terjadi untuk menghapuskan semangat dan jiwa orang-orang Indonesia daripada insaf kepada

bahaya penjajahan itu. Kemudian di dalam kurun yang kedua puluh terbit pula semangat-semangat yang baharu dengan berdirinya Syarikat Islam Indonesia dengan anjuran Almarhum Tuan Haji Umar Said Tjokro Aminoto (ayahanda kepada Tun Anur Tjokro Aminoto dan bekas mertua kepada Presiden Sukarno). Pergerakan ini telah menjulang tinggi sehingga ahli-ahlinya meningkat kepada dua million orang berserak di merata Indonesia dan dengannya fitnah-fitnah Belanda untuk meruntuhkannya di sana berbagai-bagi jalan sehingga almarhum itu berapa kali telah ditahan dengan sebab semangat umat Islam pada masa itu telah berkobar-kobar tidak redha kepada penjajahan Belanda dan dengan kerana Almarhum itu masih kuat berpegang kepada tidak mau menjalankan kekerasan maka sebahagian daripada kaum Muslimin itupun berpecah belah lalu memasuki Partai Komunis Indonesia yang kemudiannya bersama-sama mengadakan bangkitan yang hebat pada tahun 1926 yang menjadikan Belanda terkejut melihat langkah itu.

Seterusnya demikianlah semangat mengadakan perlawanan itu dari semasa ke semasa bertambah-tambah galak bertiup di dada orang-orang Indonesia sehingga kepada riwayat yang berhijrah ini membawa kepada riwayat yang bergemilang dengan mendapat kemenangan sehingga penjajahan Belanda tiga kurun setengah lamanya itu akhirnya telah tidak dapat lagi dipertahankan oleh mereka iaitu dengan kesudahannya menyerahkan semula kedaulatan negeri itu kepada anak negerinya setelah memerah mendesak dan melakukan penganiayaan-penganiayaan yang dipercayai tidak akan dilupakan oleh umat Indonesia.

Dengan kerana itulah maka istiadat yang diadakan pada petang itu disambut dengan gembira dan bersukacita oleh mereka itu sekalipun mereka mensifatkan bahawa Hari Kemerdekaan mereka iaitu pada 17 Ogos semenjak daripada isytihar Presiden Sukarno di Gang Jaksa pada 17 Ogos tahun 1945 dengan sebab itulah penyambutan pada 27 Disember ini tidak disambut dengan besar hanya sebagai suatu istiadat yang kecil

ja jika dinisbahkan kepada penyambutan hari kemerdekaan mereka. Demikianlah pada petang itu di hadapan Istana di Gambir itu manusia tidaklah begitu banyak menyaksikan istiadat itu dari luar. Sekalian dif-dif mulai dari pukul 4 petang hari itu telah berduyun-duyun datang ke Istana itu wartawan-wartawan dari segala ceruk akhbar-akhbar Indonesia kelihatan ada di sana dan demikian juga wakil-wakil akhbar dari luar negeri termasuk daripada Semenanjung Tanah Melayu ini.

Wakil-wakil kerajaan asing masing-masing dengan pakaian rasminya lepas seorang-seorang telah datang ke sana itu. Dari Semenanjung Tanah Melayu ini yang hadir di sana ialah Tuan Yang Terutama Malcolm McDonald sebagai wakil Duli Yang Maha Mulia Baginda King, Dato' Onn bin Jaffar sebagai wakil Semenanjung Tanah Melayu dan Taukeh Tan Chin Tuan sebagai wakil Singapura. Apabila Sultan Hamangku Buwono Menteri Pertahanan Indonesia yang menjadi wakil mutlak bagi pihak Indonesia datang dan Tuan van Roijen Gabenor Jeneral Indonesia sampai maka sekalian dif-dif itupun telah dipersilakan masuk ke tempat istiadat itu diadakan. Di tempat-tempat bangunan itu terletak sebuah meja panjang membujur beralas dengan kain hijau di sebelah kanan kepala meja itu duduk wakil-wakil Indonesia dan di sebelah kirinya duduk wakil-wakil Belanda pada kepala meja itu di sebelah kanan duduk Sultan Hamengkubuwono dan di sebelah kiri Tuan van Roijen.

Istiadat itu dimulakan dengan ucapan yang panjang daripada Tuan van Roijen dan dalam Bahasa Belanda meriwayatkan kerjasama yang rapat di antara orang-orang Indonesia dengan Belanda dengan meletakkan sesuatu harapan bahawa perhubungan itu akan berkekalan dan berkepanjangan sehingga sekalipun Belanda tidak lagi sebagai "pengawal" bagi Indonesia itu. Ucapan itu telah dijawab oleh Sultan Hamengkubuwono dengan bahasa Indonesia. Di sini teringatlah saya bagaimana

bahasa Indonesia yang dahulunya tidak diperkenani digunakan di dalam Dewan-dewan Mesyuarat di seluruh Indonesia itu sekarang telah menjadi bahasa yang digunakan oleh mereka itu . Demikian inilah hendaknya fikir saya, kita orang Melayu di dalam Mesyuarat-mesyuarat Negeri atau Persekutuan Tanah Melayu janganlah menggunakan bahasa asing tetapi gunakanlah bahasa sendiri sebab yang demikian bermakna kita memuliakan bahasa kita yang menjadi tuan bagi negeri ini. Kemuliaan bahasa kita itu tidak akan mulia kalau kita sendiri tidak memuliakannya. Oleh sebab itu saya pada masa itu sangat-sangat berbesar hati mendengar bagaimana hebatnya bahasa itu digunakan oleh bangsa sendiri bagi menunjukkan kemuliaannya.

Kemudian setelah balas membalas ucapan itu tamat

maka dif-dif di situ diminta bangkit berdiri kerana mendengar ucapan Queen Juliana di Amsterdam Holland berkenaan dengan penyerahan yang sama masanya diadakan di sana. Setelah habis ucapan itu maka kemudian dif-dif itu duduk semula dan setelah itu maka istiadat menandatangani penyerahan itupun diadakan. Pada masa itulah iaitu pada masa yang beriwayat yang tidak boleh dilupakan oleh tiap-tiap orang Indonesia itu. Ahli-ahli penggambar telah merempuh ke tengah tidak dapat ditahan-tahan lagi sehingga mereka mengambil gambar-gambar itu mencelah-celah di antara kepala-kepala wakil-wakil yang duduk di situ lepas seorang, seorang lagi berebut-rebut sehingga istiadat menandatangani itu ditamatkan.

Sehabis itu maka sekalian orang pun diminta pergi ke padang di hadapan istana itu bagi menyempurnakan



Tua muda, kecil besar terpaksa berasak-asak terkena desak dari belakang oleh manusia yang tidak kurang dari seratus ribu banyaknya tatkala membuat ketibaan Presiden Sukarno ke Jakarta pada 28 Disember 1940 - Gambar Qalam

Istiadat menurunkan bendera Belanda yang telah berkibar 350 tahun lamanya di Indonesia yang masa itu sedang berkibar di atasnya gambar yang mempunyai penuh riwayat yang pada masa yang telah lalu dinding-dindingnya penuh terletak gambar-gambar Gabenor-Gabenor Jeneral Belanda yang di antaranya gabenor Jeneral Daendals yang mashyur keganasannya tatkala membuka jalan raya membujur Pulau Jawa daripada Anyer ke Banyu Wangi yang banyak memakan korban itu.

Menghadap di hadapan istana itu pada sebelah kiri terletak sepasukan pancaragam Belanda dan di sebelah kanannya terletak pasukan pancaragam Indonesia. Setelah dif-dif semuanya turun maka pada baris yang ke hadapan sekali berdiri pun van Roijen ,di kanannya berdiri Sultan Hamangku Buwono. Setelah menstaid sekaliannya itu maka istiadat menurunkan bendera Belanda pun dimulai dengan diiringi oleh lagu kebangsaan Belanda. Pada masa itu saya bersegera mengambil gambarnya dan sambil-sambil itu saya memerhati muka Gabenor Jeneral van Roijen di dalam mana saya melihat ia mengetap bibirnya dengan rupa yang sedih seolah-olah sebagai menahan air matanya keluar. Pada masa itu suara orang-orang Indonesia yang di luar istana itu melihat bendera itu turun bersorak dengan gegak gempita seakan-akan membela bumi bunyinya.

Kemudian istiadat menaikkan bendera Indonesia dimulakan. Sambil menaikkan itu lagu Indonesia raya telah dibunyikan oleh pasukan pancaragam Indonesia yang mempunyai roh yang bersemangat sedang pada masa itu Sultan Hamengkubuwono kelihatan tersenyum dan angin pada masa itu pun bertiup dengan kencangnya seolah-olahnya memberitahu kepada umat Indonesia bahawa dengan penyerahan hari itu umat Indonesia masih lagi menghadapi badai yang kencang yang menyuruh mereka berhati-hati menjalankan bahteranya membawa kepada tujuan keselamatannya pada masa yang akan datang.

Nun jauh di sana di luar daripada kawasan istana itu sekali lagi umat Indonesia bersorak dengan gegak gempita bunyinya bergembira dan bersukaria berteriak dengan sepenuh-penuh hatinya Merdeka!! Merdeka!!! tidak putus-putusnya sehingga berdiri bulu romo mengenang kehebatan dan kegembiraan pada masa itu. Sesungguhnya kejadian itu tidak dapat saya lupakan sama sekali mengenang kepada kehebatan keadaan pada masa itu. Keadaan pada masa itu sudah tidak ketentuan lagi sebab kegembiraan telah naik oleh kerana keadaan pada masa itu telah menunjukkan bahawa pengorbanan jiwa, pengorbanan darah, pengorbanan tenaga dan pengorbanan segala-galanya yang telah diberikan oleh umat Indonesia mendirikan negara merdekanya itu telah sampai kepada tujuan, telah sampai kepala matlamat yang dituju mereka menjadikan negara Indonesia itu merdeka. Merdeka di dalam serba serbinya.

Setelah habis istiadat itu maka Gabenor van Roijen pun memberi selamat tinggal kepada dif-dif yang ada di situ kemudian ia lalu dihantarkan oleh Sultan Hamangku Buwono dengan diiringi oleh pasukan kawalan pergi menuju ke Padang Kapal Terbang Kemanyoran kerana dari sana pada petang itu juga ia berlepas balik ke negeri Belanda dan dengan pemergiannya itu bermaknalah penjajahan Belanda telah tamat di Indonesia setelah petumpahan-petumpahan darah telah berlaku sehingga darah-darah mujahid yang mempertahankan Indonesia itu jika dikumpulkan boleh menjadi suatu anak sungai yang mengalir tidak berhenti-hentinya semenjak perjuangan Pangeran Diponegoro

Pagi esoknya (28 Disember) rancangan menyambut Presiden Sukarno telah diadakan. Daripada tarikh itu Presiden Sukarno telah meninggalkan bandar Jakarta selama empat tahun. Pagi-pagi lagi manusia melawat-lawat daripada segala

ceruk bandar Jakarta yang luas itu telah berduyun-duyun datang menuju ke hadapan Istana Gambir yang dari pagi-pagi lagi telah dikawal oleh askar-askar dan polis dengan menentukan tempat-tempat bagi orang-orang yang datang hendak melihat ketibaan Presiden Sukarno. Manusia yang melawat itu beratus-ratus ribu banyaknya dari pagi-pagi itu tidak mau bergerak dan berasak dan apabila hari telah mulai tinggi maka oleh kerana hawa yang panas daripada wap manusia yang berasak-asak itu maka lepas satu-satu lagi manusia yang pengsan dan pitam sehingga menjadikan juru-jururawat orang sakit yang berkawal di situ tidak berhenti-henti bekerja bahkan apabila hari semakin tinggi pekerjaan mereka semakin berat kerana mereka yang pengsan dan pitam itu telah semakin banyak sedang manusia di situ tidak mau beredar menunggu ketibaan Presiden Sukarno yang dicintai oleh mereka.

Apabila jam menunjukkan hampir-hampir pukul 11 maka menurut perkiraan saya pada masa itu tidak kurang dari 200 orang telah pengsan atau pitam namun mereka itu tidak bergerak dari situ bahkan seketika-seketika terdengar bunyi riuh oleh sebab himpitan-himpitan yang hebat dari belakang sehingga menjadikan polis hampir-hampir tidak terkawal. Sekejap-sekejap kumpulan mereka itu terpecah dan terpaksa ditolak semula ke belakang.

Di dalam masa keadaan yang demikian itu maka nun dari jauh kedengaran bunyi kapal terbang melayang di angkasa yang bertanda dengan merah putih. Melihat kapal terbang itu manusia di situ bersorak kerana mereka mengetahui bahawa yang datang itu ialah Presiden Sukarno dan pengiring-pengiringnya. Kapal terbang itu akhirnya turun di Kemayoran. Apakala kapal terbang itu turun maka dalam masa Presiden Sukarno memeriksa barisan kawalan kehormatan di situ maka sebuah jip yang terbuka diiringi oleh beberapa buah motosikal telah berjalan dari sana membawa suatu bingkisan yang berbungkus

dengan kain sutera kuning yang di dalamnya terletak bendera pusaka yakni bendera Sang Saka Merah Putih yang dikibarkan di Gang Jaksa pada 17 ogos 1945 setelah isytihar kemerdekaan Indonesia dimaklumkan di sana.

Apabila angkatan ini sampai ke hadapan Istana Gambir maka sorak pun bergemuruh menyambutnya tetapi yang lebih hebat lagi ialah jauh di sana telah berbunyi sorak dan tempik yang kuat daripada rakyat jelata menyeru merdeka menunjukkan Presiden Sukarno telah mulai di dalam perjalannya menuju ke Istana Gambir. Di dalam perjalanan itu ia disambut dengan sorak dan sebutan merdeka yang bergemuruh sambil belia-beliannya berkejar-kejar hampir kepada motokar kenaikannya sehingga tidak dapat ditahan lagi oleh pengawal-pengawal di situ. Yang demikian ini terutamanya apakala motokar itu sampai di Istana Gambir di dalam mana kegembiraan umat pada masa itu telah naik. Mereka merempuh polis yang berkumpul menyerbu kenaikkan Presiden Sukarno sehingga motokar itu terhenti tidak dapat berjalan terkepung oleh khlayak yang bergembira itu dengan sorak yang bergemuruh. Dengan demikian di antara hadapan istana sehingga sampai di tangga istana perjalannya hampir-hampir 15 minit dan sekali lagi dalam masa itu di situ tidak dapat dikawal lagi kerana mereka itu telah menyerbu masuk sehingga naik ke dalam istana.

Dengan ini segala rancangan yang tertentu rosak iaitu dirancangkan bahawa Presiden Sukarno akan memberi ucapan di pintu luar istana. Di dalam masa yang begitu hebat Presiden Sukarno dengan kedua-dua belah tangannya menyambut sambutan itu dengan muka yang berseri-seri. Kemudian apabila ia telah masuk ke istana maka di tangga istana bergaullah dif-dif dan orang-orang kebanyakkan yang tidak dapat dikawal lagi. Akhirnya di dalam lingkungan orang-orang yang banyak itu Presiden Sukarno memberi ucapannya dengan lebih dahulu mengucapkan

Alhamdulillah serta bersyukur kepada Allah yang telah memberi ia peluang semula datang kerja ke Jakarta setelah empat tahun ditinggalkannya.

“Empat tahun itu bagiku adalah serasa empat puluh tahun” - kata Presiden Sukarno yang telah disambut oleh suara yang bergemuruh betul! Ia menyampaikan juga salam rakan-rakan seperjuangan di Jogjakarta kepada penduduk-penduduk Jakarta kaum taninya, tukang becanya, tukang sayurnya yang semuanya itu disambut dengan gembira dan sorak oleh mereka itu. Akhirnya Presiden Sukarno mengingatkan supaya tiap-tiap seorang hendaklah berusaha mengawal dan membetulkan dirinya dengan membawa firman Allah yang maksudnya bahwasanya Allah tidak akan mengubah nasib sesuatu kaum itu melainkan kaum itu sendiri mengubah nasibnya.

Tatkala menutup ucapan itu Presiden Sukarno meminta hadirin dengan sepenuh-penuh hati mengucapkan merdeka berturut-turut dengan sepuas-puasnya dan permintaan itu telah disambut oleh mereka itu dengan ucapan merdeka, merdeka berpuluhan-puluhan kali. Masa itu saya berdiri di hadapan sebuah jip sambil mengambil gambar dan di tepi saya ada seorang tua yang nampaknya bersemangat kerana ia memakai songkok tentera dan pakaian seakan-akan pakaian tentera. Apabila diminta menyebut merdeka itu maka saya dengan tidak sahaja menoleh kepadanya dan saya dapati oleh kerana semangatnya yang kuat itu maka mulai daripada ia menyebut dengan suara yang kuat daripada perkataan merdeka sehingga membawa kepada mulutnya sahaja yang bergerak dan suaranya hilang dan tidak lamanya kelihatan ia terduduk.

Kegembiraan pada masa itu luar biasa dan di sini zahirlah dengan terangnya bagaimana kasihan umat Indonesia kepada Presiden mereka yang sentiasa memberangsangkan mereka dengan ucapan-ucapan yang bersemangat dan berapi-api tetapi tidak

lupa kepada kebesaran Ilahi dan pertolongan Tuhan kepada perjuangan mereka itu. Jika ucapan-ucapan Sukarno pada masa tahun 1927 iaitu dengan permulaannya sebagai ketua kepada sebuah pertubuhan siasah hanya memberi ucapan-ucapan yang memberi semangat kebangsaan sahaja dan meninggalkan perkara-perkara keagamaan tetapi pada masa ini ia memberi ucapan-ucapan dengan berselangkangan pengajaran-pengajaran agama Islam yang diketahuinya bahawa dengan pengajaran-pengajaran agama itulah jiwa umat Indonesia itu akan mudah dipandu dan dipimpin dan dengan mempercayai kepada kekuasaan Ilahi itulah umat Indonesia yang lemah dalam serba serbinya itu telah mendapat petunjuk dan pertolongan daripada Ilahi mendapat kemerdekaan dengan perjuangan mujahid-mujahid Islam yang yakin kepada ke-Esaan Tuhanya sebagaimana juga ketabahan umat Islam Pakistan mendirikan negara Pakistan di India itu.

Yang demikian sepatutnya diperhati dan dikaji oleh orang-orang kita Melayu yang sebahagian daripada penganjur-penganjur mereka itu boleh disifatkan enggan ataupun tidak mempunyai kepercayaan bahawa dengan agama itulah orang Melayu dapat terselamat dan dapat diselamatkan daripada rempuhan-rempuan anak-anak dagang dan dengan agama itulah mengikut perjanjian-perjanjian yang ada, orang Islam dapat menyusun kekuatan-kekuatannya yang telah dilumpuhkan dengan suatu manisan yang bercampur di dalamnya anasir untuk membunuh semangat dan roh mereka itu. Tetapi dengan malangnya peluang yang sebegini terbuka tidak diperhati dan tidak digunakan sedang ulama-ulamanya yang berpengaruh masing-masing menjaga periuk nasinya sahaja, tidak berani membuka barang yang Haq sehingga yang batil bermaharajalela dan seolah-olahnya lupa bahwasanya dengan Haq itulah Rasulullah (SAW) telah mencontohkan untuk meruntuhkan barang yang batil.

bersambung